

## **RECENZIJA**

**teksta „Stanje i kretanje kriminaliteta u Bosni i Hercegovini za punoljetne osobe u periodu od 2003. do 2012. godine“**

Hvale vrijedan je uloženi trud grupe istraživača s pravnih fakulteta u BiH, u sastavu: prof. dr. Hajrija Sijerčić-Čolić, Pravni fakultet Univerziteta u Sarajevu; mr. Nikola Findrik, viši asistent na Pravnom fakultetu Univerziteta u Bihaću; doc. dr. Vedad Gurda, Pravni fakultet Univerziteta u Tuzli; mr. Milijana Lepir, asistent na Pravnom fakultetu Univerziteta u Banjoj Luci; doc. dr. Dževad Mahmutović, Pravni fakultet Univerziteta u Tuzli; mr. Denis Pajić, viši asistent na Pravnom fakultetu Univerziteta "Džemal Bijedić" u Mostaru; doc. dr. Nezir Pivić, Pravni fakultet Univerziteta u Zenici; Ivana Stipanović, asistent na Pravnom fakultetu Sveučilišta u Mostaru; mr. Vildana Vranj, viši asistent na Pravnom fakultetu Univerziteta u Sarajevu, koja je pripremila istraživanje o stanju i kretanju kriminaliteta u BiH za punoljetne osobe u vremenu od 2003. do 2012. godine.

Materijal obuhvata sljedeća poglavlja: uvodni dio koji se odnosi na metodološke pristupe u prikupljanju i evidentiranju podataka o dinamici kriminaliteta u određenom vremenu i na određenom području. Zatim slijede izlaganja o podacima o prijavljenim krivičnim djelima, poznatim i nepoznatim izvršiocima krivičnih djela, rasvijetljenosti i strukturi prijavljenih krivičnih djela. Treći dio se odnosi na statističke podatke o prijavljenim osobama i strukturi kriminaliteta pred tužilaštva u BiH. Tim istraživanjem su obuhvaćene prijavljene osobe Tužilaštvu BiH, Federalnom tužilaštvu Federacije BiH, Republičkom tužilaštvu Republike Srpske i Tužilaštvu Brčko distrikta BiH, i to prema grupama krivičnih djela. Nakon prikaza ovih rezultata, izlaganja se nastavljaju poglavljem o istragama, podignutim i potvrđenim optužnicama, optužnicama s kaznenim nalogom i optužnicama u postupcima pregovaranja o krivnji. Peti dio se odnosi na istraživanje o sudskim odlukama u BiH, deskripciju osnovnih statističkih podataka koji se odnose na sudske odluke u BiH (po licima) i deskripciju osnovnih statističkih podataka koji se odnose na žalbe na prvostepenu presudu. U šestom dijelu daje se pregled stanja izrečenih krivičnih sankcija i alternativnih sankcija za period od 2003. do 2012. godine, s posebnim osvrtom na zatvorski sistem u BiH. Također, predstavljena su i zaključna razmatranja.

Vremenski period obuhvaćen u ovom istraživanju te prikupljeni statistički podaci, upućuju na zaključak da zapaženi trendovi o stanju i kreta-

nju kriminaliteta mogu zadovoljiti test objektivnosti i predstavljati osnovu za dalja analitička razmatranja, kao i poslužiti zadovoljavanju određenih naučnih potreba.

U ovom radu analiziraju se statistički podaci policije, Visokog sudskog i tužilačkog vijeća, Zavoda za statistiku Federacije BiH i Zavoda za statistiku Republike Srpske, te podaci koji su objavljeni u izvještajima tužilaštava u BiH. Jedinica promatranja je kako prijavljeno i procesuirano krivično djelo, tako i struktura krivičnih djela, uzimajući u obzir krivično zakonodavstvo u BiH. Procjena trendova i strukture kriminaliteta zavisi o izvorima podataka na osnovu kojih se kriminalitet prati. To u svom radu naglašavaju i autori. Posebno ističu da je situacija složena u BiH, s obzirom na neu jednačnost metodoloških pristupa u prikupljanju podataka koji se odnose na dinamiku i strukturu kriminaliteta.

Autori također napominju da prikupljanje statističkih podataka nije jedino ograničenje u praćenju kriminaliteta u vremenski i geografski određenom okviru. Na ova proučavanja utiču i promjene u zakonodavstvu, kreiranju kriminalne politike, promjene u kaznenoj politici kao i fenomenologija i etiologija kriminaliteta.

S obzirom na važnost trajnog praćenja kretanja kriminaliteta u određenoj sredini, posebno BiH u cijelini, uvažavajući prakse krivičnog pravosuđa, značaj ove publikacije je izuzetno veliki, jer naglašava ozbiljnost potreba za metodološkim ujednačavanjem evidentiranja, prikupljanja i iskazivanja statističkih podataka koje bi moralo biti usaglašeno i sa potrebama i zahtjevima Evropske unije o praćenju stanja kriminaliteta u BiH kao budućoj članici.

S toga objavljivanje ove publikacije ne samo da može doprinijeti animiranju nadležnih organa u BiH za preduzimanje odgovarajućih aktivnosti za ostvarenje tih ciljeva, nego i istovremeno biti adekvatna nagrada njenim autorima.

Sarajevo, 24. 05. 2013.

Zdravko Knežević

